


Senin	Selasa	Rabu	Kamis	Jumat	Sabtu	Minggu
1	2	3	(4)	5	6	7
17	18	19	20	21	22	23

Jan	Peb	Mar	Apr	Mei	Jun	Jul	Ags	Sep	Okt	Nov	Des
-----	-----	-----	-----	-----	-----	-----	-----	-----	-----	-----	-----

## Tamu

Kasenian Sunda anu baheula dianggap kampungan ku generasi Nggora, kurang payu dijualna, jeung matak sangsara anu ngokolakeunana/senimanna, katompernakeun disaluprih (dipelajari), diarulik, dimekarkeun ku barudak ngora. Alhasil Kasenian Sunda jadi undak harkat napak dina sagala kalangan masarakat, "nganasional", ti kasenian kelas "Agustusan" nepi ka kagiatan paguron luhur, kapanarentahan, swasta, nepi ka Istana Nagara, jeung lawatan/pertukaran kabudayaan ka luar nagri, kasenian Sunda tara tinggaleun dipagelarkeun. Berekahna kasenian Sunda dina mangsa kiwari pikeun para seniman anu ngokolakeunana, bisa disebutkeun "cangra". Titenan wae Sule anu kiwari sukses jadi kokojo / bentangna dina Opera Van Java (OVJ), kapan indit-inditanana tina warna kasenian Sunda anu ditaratas bareng jeung dua baturna ti SOS Oni jeung Ogi tina pasanggiri komedi API (Audisi Pelawak Indonesia) TPI taun 2005. Kitu deui pikeun Oni (34), kasenian Sunda geus ngalancarkeun angen-angenna bisa nyuprih elmu di paguron luhur anu kawentar, Universitas Padjadajaran. Ku alatan kasenian Sunda Oni bisa ngalanglang ka sakuliah jagat (Eropah Wetan, Eropah Kulon, Australia), magelaran bareng jeung Tim Kasenian Unpad. Ku Kasenian Sunda Oni bisa "melet" jeung taun 2007 ngadahup ka Laina Rafanti S.H., MH, (kiwari Dosen Fakultas Hukum Unpad) Swanna rektor Unpad anu ka-9 Prof.Dr. Himendra Wargahadibrata. Ku kasenian Sunda Oni bisa wawuh jeung sagala lapisan masarakat ti mimiki tukang beca nepi ka gupernur, subur ku dulur, loba baraya. Ku alatan kasenian Sunda Oni jadi remen maen sinetron, ngabodor, Da' wah, jeung jadi MC/pamawa acara, cukup jeung tengtrem hirupna. Malah ku kasenian Sunda Oni kungsi "dilamar" pikeun jadi Wakil Bupati Subang. Ku pangaweruhna dina ngokolakeun kasenian-kabudayaan



# Oni SOS

## Kasenian Sunda Bisa Muka Lawang Dunya!



Sunda Oni seja nyalon jadi Ketua BPD (Badan Perwakilan Daerah). Ku kasenian Sunda Oni bisa muka lawang dunya!

#### Komedian Nyentrik Regenerasi Kang Ibing

Sabenerna Suwarman (ngaran asli Oni), teu kakocoran getih ti sepuh-sepuhna, Indung-Bapa, Nini-Akina lain ahli seni, tapi estu patani sajati! Ngan teuing kumaha Oni ti leuleutik bet resep kana seni, ti bubudak ngokolakeun kabudayaan Sunda, jeung remen meu-nang pangajen di sakolana..Geura nalika keur sakola di SD Balingbing 2 Pagaden Subang, Oni geus jadi Pinunjul I Pasanggiri Reog Cilik Tingkat SD sa-Kabupaten Subang (1989), Oni harita diaping ku guruna anu ahli seni Pa Iding, kiwari mah jadi kapala sakola SD Rancabogo Pagaden. Kitu deui nalika keur di SMPN 4 Subang Oni anu diaping ku Pa Hendra Sosiawan teh remen jadi pinunjul dina widang kasenian, saperti taun 1990 Juara

Lomba Lawak sa-Kabupaten Subang, dina lomba-lomba pidato(biantara) basa Sunda ge oni remen jadi juara, komo dina taun 1993 mah jadi Pinunjul I jeung Juara Umum Pasanggiri Bianatara Basa Sunda (PBBS) sa-Jawa Barat anu diayakeun ku Paguyuban Mahasiswa Sastra Sunda (PAMASS) Unpad. Nepi ka kacatet jadi siswa di SMKI (Sekolah Menengah Karawitan Indonesia, kiwari SMKN 10 Bandung) taun 1993, Oni teu reureuh miluan lomba pidato basa Sunda nepi ka taun 95-97 jeung terus-terusan jadi juara kahiji deuih.

Sanggeusna sakola di SMKI Oni bisa sageblengna mekarkeun bakatna, lian ti nyuprih elmu ti guru-guruna teh Oni ge nyieun grup kasenian anu diaping ku Ogi. Saterusna Ogi nyieun grup SOS (anu kawentar sabadana jadi juara dina API (Audisi Pelawak Indonesia) TPI taun 2005), Ari "SOS" teh wancahan tina ngaran personilna, Sutisna (Sule), Obin Wahyudin (Ogi), jeung Suwarman (Oni), atawa bisa oge singetan tina "Seninya Orang Sunda". Salususna ti SMKI taun 1997 Oni jadi mahasiswa D3 Dukumentasi Budaya Fakultas Sastra Unpad lulus taun 2000. Saterusna Oni neruskeun ka Program Ekstension Fikom (Fakultas Ilmu Komunikasi) Unpad taun 2002, tapi kateug di tengah jalan cenah ge da wakuna loba kacokot ku ngokolakeun kase-nian.Antukna, "Batur mah angkat kaki(lulus), abdi mah angkat tangan (nyerah)..ha..ha !" pokna nyeungseurikeun kaluanna sorangan. Tapi sigana mah rek dikeureuyeuh deui tah. Enya lebar Ni! Memang anu kasaksian lian ti tetep ngokolakeun kasenian Sunda jeung grupna, di Unpad Oni ge aktip di Lingkung Seni Sunda (Lises) jeung Tim Kasenian Unpad anu remen magelaran ka sakuliah mancanagara, nyeungitkeun bangsa, nagara katut almamater tercinta! Kawantu Oni mah sagala bisa, gamelan, rebab, kacapi, suling ge kacepeng tah. Tapi spesialisasina mah dina Rincik / Bonang cenah ge.Malah nalika di Australia mah kungsi ngadalang sagala tah. Sumawonna di Eropah mah lian ti nabeuh gamelan teh make jeung Ngibing Ponggawa sagala cenah ge. "Malah nuju lawatan budaya teh abdi mah di Australia (99) kantos bari usaha icalan suling sagala Kang. Muhan suling anu di Bandung pangaos hijina mung 2.500 rupia teh ku abdi di ditu diiul Rp.40.000, mangkaning aya 200 suling tah, pajeng sadayana deuih. Hadoh..panen tah! Tapi cilaka, dongkap ka Bandung anu masihanna bendu. Da sirik meureun nya.. tah eta jalmina ge !Ha..ha!" Cek Oni

bari nunjuk ka babaturanana nu keur nyenghel di gigireunana, Ahmad Kucir, anggota SOS keneh pamaen kacapi, da baheula mah SOS teh opatan cenah ge. Harita ngawangkong jeung Oni teh pabeubeurang di buruan B Mall Jalan Naripan, antare naker bari nyuruput jus.Tapi ngawangkong teh teu kaur pok da sok kapegat ku nu nelepon jeung nu menta dipoto bareng. Bener, geus "beken (kawentar)" yeuh ayeuna mah. Sukur we On.Ngiring bingah.

Tah aya carita pikalucueun jeung monumental cenah nalika Oni rek asup ka Unpad. Kapanan ngaran asli Oni teh Suwarman, wah cenah teu elit atuh maenya mahasiswa Unpad ngaranna Suwarman ?!Asa "kamseu-u(kampungan sekali..heuy)" !Nya diganti ku "Sonny", "keren" kapan tah!? Tapi sabada menta bongbolongan ka guruna Pa Juharno jeung sobatna Pa Endang bandar beca, teu matut cenah. Geus we "Oni" ngaran teh ngarah ninggang kana itungan "dunya (O=1, Ni =2 jumlah-jamleh jadi 3 - Sri-Lungguh- Dunya)", alhamdulillah cenah ti saprak make ngaran Oni jadi berekah, duka sugesti, pokona Hoki..heuy deuh!" Dasar tukang ngabodor.

Kiwar Oni geus jadi artis necis, bodor kahot, MC keren, mubalig unik. Tapi sikepna mah angger someah, teu uggah adat pedah geus jadi jalma kawentar. Dangdanana ge basajan sahinasa dikakaos kurung jeung make "topi seniman / topi bareta", teu robah jiga keur mangsa kuliah baheula.Kagiatan sapopoena di Bandung lamun keur reureuh sok nguriling silaturahmi ka sobat-sobatna saperti ka Ki Daus di Jati-handap. Lamun teu kitu jadi MC/pama-wa cara, nya ceramah/dakwah atawana manggung jeung grupna "Republik Oni SOS" anu ditaratas 4 taun katukang jeung babaturanana saperti Atang Boncel (kacapi/vokal), Mang Ucok "Lapidut" (Guruna Oni jeung Sule), Si Kembar Aman-Amin, Ahmad Kucir (Lurah), jeung Ican Garputala (Keyboard). Manggungna ge lampar nepi ka pasision Banten di Bayah malah mah nepi ka PT. Badak di Bontang atawa Sulawesi. Mun teu kitu Oni shooting sinetron di Cibubur Batawi, di Jonggol jeung di Bogor. Rada riweuh jeung cape cenah dina nyieun sinetron mah, nepi ka aya nu meakeun waktu 8-9 bulannna, waktu shooting teh ti Senen nepi ka Jumaah, tah Saptu ming-guna sok dipake manggung sorangan atawa jeung grupna. Jadi arang langka aya di imah ngumpul jeung kulawargana. Ku kituna dina bulan romadhon kamari mah reureuh heula cenah di imah hayang

istirahat jeung hayang tengtrem ibadah jeung kulawargana, da geus boga hasil shooting sinetron "Pengen Jadi Orang Bener (PJOB)" garapan Kang Dicky Chandra anu sok ditayangkan bada saur di SCTV, "Kantun lalajo dina televisi, neda saur ge dikauaan ku Eneng (Bojona) di rorompok mah. Kapan nikmat tah!", pokna bari ngacungkeun jempolna, mata weh keukeureuceuman, biwir ruyyah-renyoh gumasep, percis polah Kang Ibing (Suarsi) keur merankeun Si Kabayan. Oni kungsi kapiuhan basa shooting dina bulan puasa taun tukang, kacapean teuing cenah ge, atuh kapaksa puasana "bolong" sababaraha poe.

Oni memang remen maen sinetron, akting komedina geus kasaksian ku balarea dina "Suami-Suami Takut Istri", "Si Mamat Anak Metropolitan", "Sumardi Turun Gunung", Kunci Sukses (Trans 7), "Para Pencari Tuhan (PPT, di SCTV), "Itok Si Kabayan Junior" (TPI) ditambah ku sababaraha iklan layanan masarakat, jeung rea-rea deui. Alhamdulilah cenah ti waktu ka waktu nu nawaran shooting atawana manggung mah merul, boh nu boga hajat, ti guper-nur, walikota, ti kampus jeung sakola-sakola katut pasantren-pasantren di sakuliah Jawa Barat, ngan teu kacumponan kabeh, komo dina bulan-bulan ayeuna mah Oni keur nungguan jadwal "kloter" da insyaalloh cenah rek munggar haji jeung istrina. Pidua'na we cenah ti sarerea. Amien! Mugia janten Haji Mabru Ni!

Berekah, nya sareatna mah ku alatan seni cenah bisa daptar Haji teh! Da ngado'a'na ge dina sabada solat, "Nun Gusti Nu Maha Suci, mugia tina seni teh sing janten rejeki milik abdi, supados abdi tiasa ibadah ka Gusti!" Disagigireun eta Oni ge rajin sok pulak-pelak jeung ingon-ingon di Subang. Diantarana melak Jamur Merang (Supa Pare) geus aya kana 4 kumbungna. Tina hasil panenna nya berekah kabagean cenah 3 juta mah sabulanna, kawantu Jamur Merang mah unggal poe ge bisa diala, bisa dipake deungeun sangu sapopoena jeung matak sehat deuih. Oni oge di lemburna melak Lele Sangkuriang aya kana 34 balongna. Dina hal melak lele mah rada daria make nyakolakeun kapercayaanana sagala ka ahli lele Pa Nasrudin, tapi keur halodo panjang kieu mah teu lancar, da kurang cai. Ka hareupna mah hayang nyobaan Hayam Petelur jeung ngingu Meri cenah ge. Tapi Oni sabenerima ti baheula oge geus rajin ngukut Domba Garut. Boga 20 meunang meuli ti Haji Husin di Garut. Kapanan boga waragad keur nikah ge

tina hasil ngingu domba cenah ge. Beu lain lumayan deui eta teh, domba pangaji 2,5 juta geus gede payu dijual 15 juta. Dibeuli ku Haji Ade nu boga Toko Mas Tanjung di Ujungberung. Kiwari ge aya 6 deui dombana teh. Malah kungsi dibere domba Garut ku Kang Ibing (Suarsi) hideung jeung gede naker, tandukna ge meni ranggaek, dibikeun soteh pedah sok gegedor wae kana kandang, gandeng! "Pek we bawa ku silaing, Ni!" cek Kang Ibing harita, nya dibawa ka Subang. Geus di lembur mah ah dipeuncit we dipake ibadah Kurban, kapan mangpaat tah. Cek Oni bari nganuhun-keun jeung ngadoakeun Kang Ibing, mugia janten ahli sawarga. Amien! Kang Ibing memang ku Oni mah geus dianggap guru pet ku hinis. Kapanan SOS teh diapingna ku Kang Ibing, Cek Oni mah Kang Ibing gede jasana boh ka SOS boh ka dirina. Kapanan salila ieu Oni ge loba nu nyangka anak Kang Ibing. Da enya persis pisan atuh sagala rengkak pari-polah jeung dangdananana ge, setelan Si Kabayan tea! Lamun aya nu nanya kitu ku Oni sok dijawab, "Muhiun Pa Ibing mah "bapa ideologis" abdi, tapi sanes "bapa biologis (bapa kandung)!".

#### Rek Nyalon Jadi Ketua DPD Jabar

Katompernakeun loba artis anu ungah pileumpangan jadi DPR/DPRD, Wakil Walikota, Bupati atawana Wakil Gubernur. Nya teu nanaon saha wae oge meunang jadi wawakil rayat atawana diuk dina korsi pamarentahan asal bener-bener mampuh (kompeten) jeung bisa ngarahrakeun rayat, ulah ngan saukur lalagaan atawana pikeun nyiar lahan kauntungan! Oni ge ti heula kungsi "dilamar", rek dijadikeun Wakil Bupati, tapi ditolak! Tinimbangananatacan sanggup jeung loba keneh calon nu lian anu leuwih kompeten dina widangna. Tapi lamun dititah jadi DPD (Dewan Perwakilan Daerah) widang kabudayaan mah sanggup cenah ge. Lian ti non partey jeung tacan aya Ketua DPD ti kalangan budawayan, Oni saeutik-gedena boga luang, atikan, jeung praktisi dina widang seni jeung budaya Sunda, "Hayu urang hangkeutkeun deui kasenian - kabudayaan anu aya di Jawa Barat! Urang ramekeun! Kantong-kantong budaya nu aya di Jawa Barat urang hirupkeun deui, ngarah teu tumpur kari catur, ngarah teu diiwat, diaku ku batur!" Katingalina mah dina hal ieu Oni daria pisan jeung optimis (gede hate/harepan). Sabab kiwari ge Oni geus dirojong ku 25.000 warga Subang, 4000 warga garut,

tacan rojongan ti pasantren-pasantren di sakuliah Jawa Barat anu geus dianjangan ku inyana, hartina geus leuwih ti cukup pikeun pasaratan jadi "balon (bakal calon) DPD" anu merlukeun 5.500 KTP. Kulawargana, utamana bojona anu jadi Dosen di Fakultas Hukum Unpad sarua ngarojong pisan, asal bener-bener pikeun ngawangun Jawa Barat, ngarahrakeun rayat jeung ulah jadi koruptor cenah ge! Luyu jeung papatah bapana, "Oni bapa nyakolakeun hideup teh lain sina jadi jalma jeneng, tapi kudu jadi jalma anu aya gunana jeung aya mangpaatna pikeun bangsa, nagara, agama katut sasama!". Oni ge diawadianan ku sobatna Dicky Chandra anu abdikasi tina kalungguhan Wakil Bupati Garut, "Kahade lamun jadi pamingpin mah kudu siap sagalana. Lamun loba pangabutuh keneh mah, sok loba gogodana!"

"Tapi insyaalloh abdi mah moal kitu, abdi tos siap sagalana! Lamun abdi di-parengkeun jadi DPD, rek ngamalkeun sakabeh pangaweruh pikeun kamajuan tanah Pasundan, utamana dina widang seni budayana anu memang nuju kakaliceusan katarajang kasakit jaman. Tah kapanan kapengker-pengker mah abdi ngahibur batur, geus jadi DPD mah rek ngarahrakeun dulur-dulur, ngamumule hirup-hirupna kultur warisan karuhun nu luhung jeung ka abdi mah ulah ragab, abdi siap dititah, dipinangsaraya pikeun kamajuan sar-erea. Moal loba birokiasi, tapi urang bari ngawangkong "ngadubako", silaturahmi, sabilulungan babarengan ngamumule seni - budaya Sunda!" Kitu jangjina pasti!

Cag!

#### Daptar Riwayat Hirup Oni

Ngaran teges Suwarman. Oni dibabarkeun di kampung Kukulu I Desa Balingbing Kacamatan Pagaden Barat-Subang - Jawa Barat. Oni cikal ti dua sadulur anu lahir ti pasangan Tersem (Ibu) - Taswan (Bapa), adina Tarlan wedalan SMKI jeung Sastra Sunda UPI, kiwari jadi guru Tsanawiyah Plus di Subang. Taun 2007 Oni ngadahup ka Laina Rafanti S.H., MH, putra pasangan Rd. Hanny Suhatriwan Yusuf - Laila Zulaila (Ciamis). Tina rarabina boga budak hiji Genna Cantika Armani Putra (4 taun). Pendidikan terakhir Dokumentasi Budaya Program DIII Fakultas Sastra Unpad, Fikom (Ekstensi) Unpad. Kiwari Oni dumuk di wewengkon Sindangsari - Jalan Tanjungsari Antapani Bandung. \*\*\*

(ASEP GP)